

आकाशवाणी रायपुर (छत्तीसगढ़)
प्रादेशिक समाचार

1810 मंगलवार

14.07.2026

प्रमुख समाचार –

- 1— राज्य विधानसभा में मानसून सत्र के दूसरे दिन आज विपक्ष में खातू अउ बीजा के मुद्दा उठईन।
- 2— प्रदेश में खरीफ मौसम में प्रधानमंत्री फसल बीमा योजना के तहत बारह जुलाई ले पंजीयन के काम सुरू।
- 3— राज्य सासन में राजिम नगर पंचायत में नगर पालिका के रूप में उन्नयन कर देहे।

विस-स्थगन

छत्तीसगढ़ विधानसभा के मानसून सत्र के दूसरे दिन आज शून्यकाल में खाद अउ उन्नत बीज के कमी ले लेके विपक्ष में स्थगन प्रस्ताव लईस। पूर्व मुख्यमंत्री भूपेश बघेल ह कहिन कि खातू अउ बीजा में किसान मन भटकत हे। ए बछर बरसा घलो कमती होय हे, जेखर ले बोनी पिछड़ गेहे। उन्हें, नेता प्रतिपक्ष डॉक्टर चरणदास महंत ह कहिन कि डीएपी, पोटाश जइसन खातू मिलत नइ हे।

अपन जवाब में कृषि मंत्री रामविचार नेताम ह कहिन कि प्रदेश में खातू अउ बीजा के कौनों कमी नइ हे। ओमन बतईन कि प्रदेश में चौदह लाख मीट्रिक टन ले जादा के उर्वरक के उपलब्धता सुनिश्चित कर ले गेहे, जउन ह लक्ष्य के नब्बे प्रतिशत हे। उन्हें, मांग के विरुद्ध छियानवे प्रतिशत बीजा के भंडारण कर ले गेहे। श्री नेताम में बतईन कि खातू के चौरानवे नमूना जिहां ले अमानक पाय गेहे, ओखर मन उपर कार्रवाई करे गेहे। मंत्री के जवाब ले असंतुष्ट विपक्षी सदस्य मन ह सदन में नाराबाजी करत गर्भगृह में पहुंच गे, जेखर बाद ओमन खुदे निलंबित होगे।

उद्योग दुर्घटना-बहिर्गमन

प्रश्नकाल में आज विपक्ष में औद्योगिक दुर्घटना के मुद्दा उठावत सकती जिला के वेदांता पावर प्लांट में होय हादसा में निदेशक अनिल अग्रवाल के गिरफ्तारी नइ होय उपर सवाल उठईन। पूर्व मुख्यमंत्री भूपेश बघेल अउ नेता प्रतिपक्ष चरण दास महंत ह जानना चाहिन कि प्रदेश में होय जम्मा औद्योगिक दुर्घटना में निदेशक उपर कार्रवाई करे जाही।

जवाब में उद्योग मंत्री लखनलाल देवांगन ह बतईन कि खतरनाक रसायन के निर्माण अउ भंडारण अउ जुड़े नियम के मुताबिक एक बार ग्राह्य एजेंसी ले सुरक्षा ऑडिट कराय जाही। अब तक प्रदेश के बत्तीस कारखाना में ऑडिट करे गेहे। जिहां नइ होय हे, उहां कार्रवाई करे के घलो प्रावधान हे।

एमा नेता प्रतिपक्ष ह कहिन कि वेदांता पावर प्लांट में जउन हादसा होय रिहीस, उहां सिरिफ दू जिन लोगन मन ल आरोपी बताय गेहे। एमा मंत्री ह कहिन कि आने लोगन मन ल घलो आरोपी बनाय गेहे। मंत्री ह किहीन कि पुलिस ह ए मामला के जांच फैक्ट्री एक्ट के तहत करत हे। ओमन बतईन कि कंपनी डहार ले आश्रित मन ल पैतीस-पैतीस लाख रुपिया के मुआवजा दे गेहे। संगेसंग मुख्यमंत्री के घोषणा के मुताबिक पांच लाख रुपिया अउ केन्द्र डहार ले दू लाख रुपिया दे बर केहे गेहे। एखर बाद मंत्री के जवाब ले असंतुष्ट होके विपक्ष ह सदन ले बहिर्गमन कर दीन।

विधानसभा म आज विपक्ष ह सरकार के खिलाफ अविश्वास प्रस्ताव पेस करीस। एमा विधानसभा अध्यक्ष डॉक्टर रमन सिंह ह कहिन कि सत्र के आखिरी दिन सत्रह जुलाई के अविश्वास प्रस्ताव म चर्चा करे जाही।

मुख्यमंत्री-धन्यवाद प्रस्ताव

मुख्यमंत्री विष्णुदेव साय ह कहिन हे कि राज्य सरकार नक्सल मुक्त छत्तीसगढ़ उपर धन्यवाद प्रस्ताव लाही। ओमन कहिन कि केन्द्रीय गृहमंत्री अमित शाह के इच्छाशक्ति ले प्रदेश ले नक्सलवाद के समाप्ति होय हे। एखर बर विधानसभा म केन्द्र सरकार के प्रति धन्यवाद प्रस्ताव पारित करे जाही।

एमा नेता प्रतिपक्ष डॉक्टर चरणदास महंत ह राज्य सरकार उपर सहीद मनके अनदेखा के आरोप लगावत कहिन कि धन्यवाद प्रस्ताव म विपक्ष चर्चा म सामिल नइ होही। संगेसंग ए प्रस्ताव के विरोध म सदन के बहिष्कार करे जाही।

विधानसभा परिसर-पौधारोपण

विधानसभा परिसर म 'एक पेड़ मां के नाम श्री प्वाइंट ओ' अभियान के तहत वृक्षारोपण कार्यक्रम के आयोजन करे गीस। ए कार्यक्रम म विधानसभा अध्यक्ष डॉक्टर रमन सिंह अउ मुख्यमंत्री विष्णुदेव ह रुद्राक्ष के पेड़ लगईन। उहें, नेता प्रतिपक्ष डॉक्टर चरणदास महंत, उपमुख्यमंत्री विजय शर्मा, उपमुख्यमंत्री अरूण साव अउ संसदीय कार्य मंत्री केदार कश्यप समेत विधानसभा के जम्मों सदस्य मन ह वृक्षारोपण करके पर्यावरण संरक्षण के संकल्प दोहरईन।

प्रधानमंत्री फसल बीमा योजना

प्रदेस म खरीफ मौसम बर प्रधानमंत्री फसल बीमा योजना के तहत बारह जुलाई ले पंजीयन के प्रक्रिया सुरू होगे हे। कृषि विभाग ह प्रदेश के किसान मन ले इक्कीस जुलाई तक धान, मक्का, सोयाबीन समेत ग्यारह अधिसूचित फसल के बीमा कराय के अपील करे हे। मौसम विभाग डडार ले अल नीनो के प्रभाव ले अनियमित या कम बरसा के आसंका जताय के सेती कृषि विभाग ह केहे कि फसल बीमा किसान मन ल प्राकृतिक आपदा ले होवइया नुकसान के विरुद्ध आर्थिक सुरक्षा प्रदान करही।

एचपीवी टीकाकरण सप्ताह

किशोरी मन ल सर्वाइकल कैंसर ले सुरक्षित राखे बर छत्तीसगढ़ म तेरह ले अट्ठारह जुलाई तक विशेष एचपीवी टीकाकरण सप्ताह के आयोजन करे जावत हे। एखर तहत चौदह बछर के आयु के जम्मों पात्र नोनी मन ल स्वास्थ्य विभाग डडार ले निःशुल्क जीवनरक्षक एचपीवी टीका लगाय जावत हे।

राज्य टीकाकरण अधिकारी अउ उप संचालक डॉक्टर वी.आर. भगत ह बतईन कि अभियान के तहत स्कूल, आंगनबाड़ी केन्द्र, स्वास्थ्य संस्थान अउ समुदाय स्तर म जन-जागरूकता गतिविधि के आयोजन करे जात हे। डॉक्टर भगत ह अभिभावक मन ले अपील करे हे कि अपन पात्र बेटी मन ल एचपीवी टीका जरूर लगवायं।

राजिम-नगर पालिका

राज्य सासन ह राजिम नगर पंचायत ल नगर पालिका के रूप म उन्नयन कर देहे। नगरीय प्रशासन विभाग डडार ले ए बारे म अधिसूचना जारी कर दे गेहे। एखर तहत राजिम नगर पंचायत के सीमा ह राजिम नगर पालिका के सीमा होही।

उपमुख्यमंत्री अउ नगरीय प्रशासन मंत्री अरुण साव ह केहे हे कि ए फइसला ले राजिम के सुनियोजित विकास ल नवा दिसा मिलही अउ सहरी सुविधा के विस्तार बर जादा संसाधन उपलब्ध होही।

सीआरपीएफ विशेष महानिदेशक—बीजापुर

केन्द्रीय रिजर्व पुलिस बल—सीआरपीएफ के विशेष महानिदेशक दीपक कुमार ह आज बीजापुर जिला के दउरा करीन। ए दउरान ओमन सीआरपीएफ के कई ठिन कैप मनके निरीक्षण करके अधिकारी अउ जवान मन ले भेंट करीन। उंखर संग छत्तीसगढ़ सेक्टर के सीआरपीएफ के आईजी शालिन अउ डीआईजी बीएस नेगी घलो मौजदू रिहीन। ए मउका म श्री कुमार ह किहीन कि बस्तर जइसन इलाका म काम करे बर अच्छा सारीरिक क्षमता, सही प्रसिक्षण अउ सतर्कता बहुत जरूरी हे।

हाईकोर्ट—निर्देश

रायगढ़ जिला के हाथी प्रभावित धरमजयगढ़ वन क्षेत्र म नियम अउ मानक मनके उल्लंघन करके तैंतीस केवी लाइन विस्तार ल लेके छत्तीसगढ़ उच्च न्यायालय म जनहित याचिका दायर करे गेहे। कोर्ट ह केन्द्र, राज्य सरकार अउ बिजली कंपनी ल नोटिस जारी करके जवाब देके निरदेस देहे। सुनवाई के दउरान राज्य अउ केन्द्र सरकार डहार ले उपस्थित अधिवक्ता मन ह नोटिस स्वीकार करीन, जबकि निजी कंपनी ल नियमानुसार नोटिस जारी करे के निरदेस दे गीस। कोर्ट ह राज्य सरकार ल जवाब दाखिल करे बर एक हफ्ता के बेरा दे गेहे।

मेरा युवा भारत—माय भारत

भारत सरकार के युवा कार्यक्रम अउ खेल मंत्रालय के “मेरा युवा भारत—माय भारत” के तहत दुर्ग जिला के युवा मन ल कौशल विकास, इंटरनशिप, स्वयंसेवा अउ रोजगार के मउका ले जोड़े बर माय भारत पोर्टल म पंजीयन के काम सुरू कर दे गेहे। एखर बर जिला रोजगार अउ स्वरोजगार मार्गदर्शन केन्द्र म आवेदक मनके सुविधा बर विशेष पंजीयन काउंटर खोले गेहे। ए काउंटर म पन्द्रह ले उनतीस बछर के युवा मनके पोर्टल म निःशुल्क पंजीयन करे जाही।

